

## **BENG BA MESEBETSI BA TLAMEHA HO IKOBELA LATSATSI LA MAKGAOLAKGANG LA LA 31 MOTSHEANONG 2023**

**Tshwane, 29 Motsheanong 2023** – Ditshebeletso tsa Lekgetho tsa Afrika Borwa (SARS) di ipiletsa ho beng ba mesebetsi bohle ho ikobela boitlamo ba bona ba molao bo mabapi le Sehla sa ho Faela sa Beng ba Mesebetsi ka la 31 Motsheanong ho qoba dikotlo, tswala le / kapa diqoso tsa bonokwane.

Beng ba mesebetsi ba lokela ho nehelana ka Ditsebahatso tsa bona tsa Tsepamiso ya Dibuka tsa Ditjhelete (EMP501) ho SARS, mmoho le ditsebahatso tsa kgwedi ka nngwe tse morao (EMP201) le ditsepamiso tsa selemo ka seng tsa dilemo tse fetileng (EMP501).

Ditefo tsa Lekgetho la Lefa ha o ntse o fumana Moputso (PAYE) di tlameha ho ba dinakong mme *data* eo ho fanweng ka yona ho SARS e tlameha ho ba e nnetefaditsweng le e nepahetseng. *Data* e nepahetseng e bohlokwa hore SARS e tsebe ho kenya lesedi la dikgutliso tsa lekgetho la lekeno le ho hlahloba balefalekgetho ba hlwailweng ka nepo. *Data* e nepahetseng e boela e le bohlokwa moo balefalekgetho ba lokelang ho faela dikgutliso, ho ba kgontsha hore ba etse jwalo ka lesedi le nepahetseng ka nako ya sehla sa ho faela sa batho ka bomong ba bona, se qalang ka Phupu 2023.

SARS e kopa basebetsi ho lekola hore na ebe dintlha tsa bona tse kahara di-IRP5/IT3(a) di nepahetse kapa tjhe.

Bafepedi ba *data* ya mekga ya boraro ba kang dikema tsa kalafo le dibanka le bona ba lokela ho fana ka lesedi le nnetefaditsweng ho SARS le ho ditlalaente tsa yona.

Tsena ke ditlhoko tsa bohlokwa hore SARS e kgone ho fana ka tshebeletso e otlohileng le e bonolo ho balefalekgetho ho bapa le sepheo sa rona sa ho nolofaletsa balefalekgetho ho ikobela boitlamo ba bona.

Beng ba mesebetsi, ditsebi tsa lekgetho le balaodi ba tsa meputso ba hloka ho rwalla mofuta wa moraora o tjena wa Employers e@syfile. Kanale ena ya onlaene e dumella beng ba mesebetsi ho fana ka EMP501 tsa bona ka tsela ya elektronike. SARS e kgothaletsa dikgwebo tse nnyane, tse mahareng le tse nnyane-nnyane (SMMEs) ho sebedisa motjha ona le ho sutha mokgwatshebetsong wa pele wa ho tlatsa dintho ka matsoho ho ya ho wa tshebetso ya meputso wa sejwalejwale wa hanghang.

Ho fumana lesedi le fetang lena mabapi le Sehla sa ho Faela sa beng ba Mesebetsi etela websaete ya SARS e leng [www.sars.gov.za](http://www.sars.gov.za).